



道光四年刊

續唐書

士鄉堂藏板



史

210.19

857

續唐書敘

唐受命二百九十年而後唐興歷三十年後唐廢而南唐興又歷三十年而亡此六十九年唐之統固未絕也後唐系出朱邪然本于懿宗賜姓爲李莊宗旣奉天祐年號至二十年始改元同光立廟太原合高祖太宗懿宗昭宗爲七廟唐亡而實存焉歐陽氏正統論序論云伏見太宗皇帝時常命薛居正等撰梁後唐晉漢周事爲五代史凡一百五十篇又命李昉等編次前世名號爲一篇藏之祕府而昉等以梁爲僞此僞則史不宜爲帝紀而後唐之事當續劉昫唐史爲一書或比二漢離爲前後則無曰五代者

於理不安謹按昉等黜梁實屬大公至正與前人黜莽黜  
操正同乃云於理不安何歟序論又云今司天所用崇天  
厯承天祐至十九年而盡黜梁所建號援之於古惟張軌  
不用東晉大興而虛稱建興非可以爲後世法蓋後唐務  
惡梁而欲黜之厯家不識古義但用有司之傳遂不復改  
謹按崇天厯承後唐書天祐十九年蓋所謂周德雖衰天  
命未改且援之於古亦不獨張軌爲然昔周厲王失國宣  
王未立召公與周公行政號曰共和十四年上不繫  
于厲王下不繫于宣王當時固未常云周之統絕也以此  
爲例則崇天厯所書不可謂徒然矣乃云不識古義抑又

何歟今有人焉爲盜所殺欲全據其基業有僕挺身出而  
禦之艱難辛苦攘除奸凶而不改故主之名僂仍奉故主  
之宗廟則將與盜乎與僕乎夫人而知與僕不與盜也朱  
全忠大逆無道甚于莽操人人得而誅之何可不黜後唐  
旣係賜姓收之屬籍又有大勳勞于唐室則繫于唐可耳  
至石敬瑭叛主附敵父人之父聲實俱醜將十六州內地  
割獻殊方肆然僂帝斯固魯仲連所欲蹈海而死者南唐  
爲憲宗五代孫建王之元孫祀唐配天不失舊物尤宜大  
書年號以臨諸國卽如當日契丹兒晉而兄唐高麗遣使  
江南入貢僂臣彼尙懷唐之威靈故尊其後裔不敢與它

國齒今柰何以晉漢周爲正而反以南唐爲偏據乎劉旻本知遠母弟北漢四主遠兼郭柴宋太平興國四年受降又後于南唐七年宋統繼唐勝于繼漢繼周矣辭氏修五代史歐陽氏新修五代史記並傳五代所見俱不及此馬陸二家南唐書雖欲推尊然未將南唐上接後唐戚光年世總釋始發其凡終未有專成一書寧非缺事又按辭史裁制冗長今亦殘闕歐史紛立名目徒亂章程且八書十志馬班相仍各有誤述乃誤信史通欲廢志之言僅作司天職方二考以致唐季典章法度無可稽求馬陸二書互有得失胡恢書久已無傳然于烈祖已下謂之載記早爲

蘇頌所非餘可概見蒙竊不自揆更審其順逆著其正偏上黜朱梁下擯石晉及漢周而以宋繼唐庶幾復唐六十九年之祚爲帝紀七表四志十世家十三列傳三十六凡七十卷糾辭歐之體例正馬陸之乖違廣攷羣編兼徵實錄以上續劉昫唐書續之名仿乎司馬彪續漢書而此更參用蕭常郝經等續後漢書例也其十志則于經籍一類多所收羅各傳則于忠義諸臣尤深致意經籍志以補辭歐之缺而忠佞不別列傳者人以類從賢否自見也紀傳之後略綴斷辭不曰論而曰述者從何法盛中興書例也凡後述者多旁采陸典遺聞補本篇未備所謂事無重出

續唐書目錄  
文省可知也參用史文倘義可從事可據者卽仍其舊所  
謂不以下愚自申管見也昔習鑿齒作漢晉春秋以蜀爲  
正統力矯陳壽三國志之非世咸推服後雖日久散佚而  
本其意旨用以纂修者不一其書蓋天理長存人心不死  
尙論者求其是而已斯編彙經累易力殫窮年因敘茲原  
委于簡端明非出鄙人之私見將以質諸通才糾謬纂誤  
實所願望焉

嘉慶十九年夏六月庚申朔海寧陳鱣書于紫微講舍

續唐書目錄

卷一

莊宗紀

卷二

明宗紀

卷三

閔帝紀

卷四

末帝紀

卷五

目錄  
烈祖紀

卷六

元宗紀

卷七

後主紀

卷八

紀元表

卷九

宗室表

卷十

諸國表

卷十一

大臣表

卷十二

禮儀志

卷十三

音樂志

卷十四

天文志

卷十五

五行志

卷十六

地理志

卷十七

選舉志

卷十八

職官志

卷十九

經籍志

卷二十

食貨志

卷二十一

刑法志

卷二十二

岐世家

卷二十三

吳世家

卷二十四

梁世家

卷二十五

蜀世家

卷二十六

後蜀世家

卷二十七

南漢世家

卷二十八

楚世家

卷二十九

吳越世家

卷三十

閩世家

卷三十一

南平世家

卷三十二

晉世家

卷三十三

漢世家

卷三十四

周世家

卷三十五

后妃傳

貞簡曹太后

神閔劉皇后

昭懿夏皇后

和武曹皇后

宣獻魏太后

孔皇后

劉皇后

卷三十六

后妃傳

元敬宋皇后

光穆鍾皇后

昭惠周后

繼室周后

卷三十七

宗室傳

克讓

克修 子嗣肱

克恭

克寧

邕王存美

承王存霸

薛王存禮

申王存渥

睦王存义

通王存確

雅王存紀

魏王繼岌 繼潼

繼蟾 繼崇

從璟

秦王從榮

從璨

許王從益

從哲

從吉

雍王從美

卷三十八

宗室傳

楚王景遷

晉王景傳

齊王景達

江王景暹

燕王宏冀

慶王宏茂

南楚國公從善

江南國王從鎰

鄂國公從謙

昭平郡公從慶

文陽郡公從信

清源郡公從寓

岐王從宣

卷三十九

諸臣傳

李嗣昭

子繼韜

李嗣本

李嗣恩

裴約

李存信

李存孝

李存進

李存璋

李存賢

卷四十

諸臣傳

李建及

賜姓名

符存審

賜姓名

李紹文

賜姓名

元行欽

賜姓名

夏魯奇

賜姓名  
李紹奇

霍彥威

賜姓名  
李紹真

朱友謙

賜姓名  
李紹麟

段凝

賜姓名  
李紹欽

康延孝

賜姓名  
李紹琛

王晏球

賜姓名  
李紹虞

袁象先

賜姓名  
李紹安

溫韜

賜姓名  
李紹冲

卷四十一

諸臣傳

周德威

史建塘

郭崇韜

李襲吉

卷四十二

諸臣傳

安重誨

安金全

袁建豐

西方鄴

符習

烏震

李嚴

卷四十三

諸臣傳

李琪

鄭珏

李愚

司空頰

朱漢賓

劉玘

周知裕

劉岳

馬編

卷四十四

諸臣傳

豆盧革

盧程

任圜

趙鳳

張憲

蕭希甫

劉贊

何瓚

張全義

卷四十五

諸臣傳

王思同

姚洪

張敬達

康思立

康義誠

朱洪昭

藥彥稠

宋令詢

李仁矩

毛璋

卷四十六

諸臣傳

孔謙

張延朗

劉延朗

張承業

張居翰

卷四十七

諸臣傳

徐知證

徐知諤子遊

李德誠

子建勳

周琮子

馬仁裕

妻朱氏  
子文義 文義

周玠

卷四十八

諸臣傳

宋齊邱

刁彥能子衍

游簡言

王會

張居詠

張延翰

卷四十九

諸臣傳

王崇文

王彥儔

王建封

柴克宏

何敬洙

劉崇俊

劉彥貞

邊鎬

朱匡業

卷五十

諸臣傳

常夢錫

嚴續劉奐

張易

張義方

蕭儼

卷五十一

諸臣傳

江文蔚

李貽業

歐陽廣

喬匡舜

張泌

卷五十二

諸臣傳

盧文進

李金全

皇甫暉

孟堅

子建勳

孫謙

陳誨

子德誠

卷五十三

諸臣傳

陳喬

潘佑

廖居素

孫晟

劉仁瞻

妻薛氏

卷五十四

諸臣傳

張彥卿

鄭昭業

張雄

胡則

申屠令堅

劉茂忠

周宏祚

李延鄒

鍾蒨

尚彥

朱令贊

李元清

趙仁澤

段處常

卷五十五

諸臣傳

韓熙載

徐鍇

高越

高遠

蒯鼈

郭昭慶

伍喬

魯崇範

廖凝

朱弼

卷五十六

諸臣傳

姚璟

陳起

汪煥

胡元龜

周彬

陳保極  
弟元亮

康仁傑

鍾離瑾

張維彬

許規

卷五十七

諸臣傳

史虛白

劉洞

夏竦松

毛炳

高元寂

顏詡

陳陶

陳况

陳曙

陳袞

卷五十八

諸臣傳

查文徽

馮延巳

馮延魯

陳覺

魏岑

卷五十九

諸臣傳

鍾謨

李平

盧絳

龔慎儀

劉承勳

卷六十

諸國臣傳

李彥琦

李繼徽

胡敬璋

已上岐臣

袁襲

高勛

李神福

張訓

陶雅

周本

嚴可求

賂知祥

汪台符

江夢孫

已上吳臣

卷六十一

諸國臣傳

葛從周

霍存

敬翔

劉捍

符道昭

王彥章

寇彥卿

劉鄩

牛存節

已上梁臣

卷六十二

諸國臣傳

馮涓

韋昭

周翔

周德權

張道古

陳翔

鄧元明

已上前蜀臣

趙季良

趙廷隱

趙崇溥

高彥儔

母昭裔

已上後蜀臣

卷六十三

諸國臣傳

趙光裔

楊洞潛

陳用拙

王定保 妻吳氏

周傑

黃損

簡文會

鍾允章 已上南漢臣

姚彥章

徐仲雅

廖匡圖

弟匡齊 彭師昌

子偃

石文德

劉昭禹

朱遵度 已上楚臣

卷六十四

諸國臣傳

羅隱

顧全武

杜稜 子建徽

成及

鮑君福 子修讓

曹圭 子仲達

高彥 子渭

屠瓌智 子龍瓌 晟

吳公約 子重裕

許俊

皮光業 子璨 已上吳越臣

卷六十五

諸國臣傳

韓偓

陳嶠

黃滔

徐夔

翁承贊

鄭良士

章仔鈞 妻練寫子仁坦

仁燧

留從效 已上閩臣

梁震

孫光憲

李景威 已上南平臣

卷六十六

諸國臣傳

桑維翰

景延廣

劉昫

崔悅

沈斌

王清

吳巒

尹玉羽

鄭邀

趙瑩 已上晉臣

卷六十七

諸國臣傳

王周

劉審交

蘇逢吉

史宏肇

楊邠

王章

李驤

趙華

李光美 已上漢臣

卷六十八

諸國臣傳

鄭仁誨

王朴

扈載

高行周

史彥超

韓通

和凝

王仁裕

賈緯

楊凝式

馮道

已上周臣

卷六十九

外國傳

契丹

卷七十

外國傳

奚

吐渾

達勒

党項

突厥

吐蕃

回鶻

高麗

新羅

黑水

南詔

牂牁

昆明

續唐書目錄終

續唐書卷一

海昌陳鱣撰

武林姜安  
長水祝恂同校



莊宗紀

莊宗光聖神閔孝皇帝名存勛其先本號朱邪蓋出於西突厥至其後世別自號曰沙陀而以朱邪為姓貞元中有盡忠者居北庭之金滿州遇吐蕃攻陷北庭徙盡忠於甘州後吐蕃為回鶻所敗盡忠與其子執宜東走吐蕃追至盡忠戰歿執宜獨走歸唐居之鹽州以隸河西節度使范希朝希朝徙鎮太原執宜從之居定襄神武川之新城其部落萬騎皆驍勇號沙陀軍執宜歿其子曰赤心咸通中

討龐勛有功入爲金吾上將軍賜姓李名國昌乃係鄭三房出爲鎮武節度使尋爲吐渾所襲退保於神武川及武皇鎮太原表爲代北軍節度使中和三年十月薨莊宗卽位追謚盡忠爲昭烈皇帝廟號懿祖烈考國昌追謚爲文皇廟號獻祖武皇名克用卽獻祖之第三子善騎射能仰中雙鳧爲雲中守促使殺大同軍防禦使段文楚據雲州自僭留後唐以太僕卿盧簡方爲振武節度使會幽并兵討之簡方行至嵐州軍潰由是沙陀侵掠代北爲邊患矣僖宗卽位以爲前太原節度使李業遇沙陀有恩而業已死乃以其子鈞爲靈武節度使宣慰沙陀六州三部落使

以招輯之以武皇爲大同軍防禦使居久之獻祖出擊党項吐渾赫連鐸襲破振武舉族爲其所擄武皇迎獻祖歸雲州雲州人拒關不納武皇掠蔚朔之地得三千人屯神武川之新城天子乃拜鐸大同軍使以李鈞爲代北招討使以討沙陀乾符五年沙陀破遮羅軍又破岢嵐軍而唐兵數敗沙陀由此益熾北據蔚朔南侵忻代嵐石至於太原焉廣明元年招討使李琢會幽州李可舉雲州赫連鐸擊沙陀大敗之武皇乃率其屬奔於達靺武皇少驍勇軍中號曰李鷗兒其一目眇及其貴也又號獨眼龍其威名蓋於代北其在達靺久之鬱鬱不得志又常懼其圖己因

時時從其羣豪射獵或挂鍼於木或立馬鞭百步射之輒中羣豪皆服以爲神黃巢已陷京師中和元年代北起軍使陳景思發沙陀先所降者吐渾安慶等萬人赴京師行至絳州沙陀軍亂大掠而還景思念沙陀非武皇不可將乃以詔書召於達靼承制以爲代州刺史鴈門以北行營節度使率蕃漢萬人出石嶺關過太原求發軍錢節度使鄭從讜與之錢千緡米千石武皇怒縱兵大掠而還二年十一月復以步騎萬七千至京師三年正月至於河中進屯乾院巢黨驚曰鴟兒軍至矣二月敗巢將黃鄴於石隄谷三月又敗趙章尙讓於良田坡是時諸鎮兵皆會長安

大戟渭橋賊敗走入城棗勝追之巢敗南走出藍田關京師平七月天子授武皇檢校司空同中書門下平章事河東節度使十月顯祖卒十一月遣其弟克修攻昭義孟方立取其澤潞二州方立走山東以邢洛慈三州自別爲昭義軍黃巢南走至蔡州降秦宗權遂攻陳州中和四年春武皇以兵五萬救陳州出天井關假道河陽諸葛爽不許乃自河中渡河四月敗尙讓於太康又敗黃鄴於西華巢且走且戰至中牟臨河未度而武皇追及之賊衆驚潰比至封邱又敗之巢脫身走武皇追之至於冤胸不及而還過汴州休軍封禪寺朱全忠饗武皇於上原驛夜酒罷武

皇醉臥伏兵發火起侍者郭景銖滅燭匿武皇牀下以水醒面而告以難會天大雨滅火武皇得從者薛鐵山賀回鶻等隨電光絕尉氏門出還軍中七月至於太原訟其事於京師請加兵於汴僖宗和解之田令孜有隙徙重榮充州以定州王處存爲河中節度使詔武皇以兵護處存重榮使人給曰天子使重榮俟其至與處存共誅之因僞爲詔書示武皇曰此朱全忠之謀也武皇信之八上表請誅全忠僖宗不許武皇大怒重榮旣不肯從僖宗遣邠州朱玫鳳翔李昌符討之武皇反以兵助重榮敗玫於沙苑遂犯京師縱火大掠天子出居於興元武皇退屯河中朱玫

亦反以兵追天子不及得襄王煚迫之稱帝屯於鳳翔僖宗遣諫議大夫劉崇望以詔書召武皇使進兵討玫等武皇陽諾而不行間道奉表於行在始朝廷意玫結武皇用迫乘輿及表至示羣臣因騰曉山南諸鎮行在少安王行瑜斬玫武皇以千騎經略京畿文德元年二月僖宗自興元還京三月僖宗崩昭宗卽位進武皇檢校太師兼侍中大順元年遣存孝攻邢州孟遷以邢洛磁三州降乃遣安金俊攻赫連鐸於雲州幽州李匡威救鐸戰於蔚州金俊大敗於是匡威鐸及朱全忠等皆請因其敗伐之宰相張濬是其計乃下制削武皇官爵以濬爲招討使韓建爲副

續唐書卷一  
使是時潞州將馮霸叛降於梁梁遣葛從周入潞州朝廷以孫揆爲昭義軍節度使武皇遣存孝執揆於長子又遣康君立取潞州十一月濬及武皇戰於陰地濬軍三戰三敗由含山路遁去大順二年春正月武皇上表自訴其辭慢侮優詔荅之復拜爲河東節度使隴西郡王加檢校太師兼中書令四月攻赫連鐸於雲州鐸走吐渾八月大蒐於太原出晉絳掠懷孟至於邢州遂攻王鎔於鎮州十月李存孝董前軍取臨城進攻元氏李匡威救鎔武皇退軍邢州景福元年正月王鎔攻邢州李存信李嗣勳等敗鎔於堯山二月會王處存攻鎔戰於新市爲鎔所敗八月李匡

威攻雲州武皇潛軍入於雲州詰旦出騎軍以擊之匡威敗走十月李存孝以邢州叛景福二年春大舉以伐王鎔以其通好於李存孝也二月攻天長鎮七月討李存孝於邢州遂攻平山渡滹水攻鎮州王鎔懼以帛五十萬犒軍請修舊好乃出兵助攻邢州乾寧元年執存孝殺之冬攻幽州李匡儔棄城走追至景城見殺以劉仁恭爲留後乾寧二年六月武皇自晉陽趨三輔討鳳翔李茂貞邠州王行瑜華州韓建之亂先是二帥稱兵同弱王室時河中節度使王重盈卒其子珂卽武皇之子壻也與兄珙爭立武皇請立珂二帥請立珙昭宗兩難之乃以宰相崔胤爲河

中節度使既而許立珂三帥怒遂以兵犯京師聞武皇亦起兵乃皆罷去是月攻絳州斬刺史王瑤瑤珙弟助珙以爭者七月至於河中同州王行約奔京師陽言曰沙陀十萬至矣謀奉天子幸邠州茂貞假子閻圭亦謀劫幸鳳翔京師大亂昭宗出居於石門武皇軍留月餘不進昭宗遣延王戒丕丹王允兄事武皇且告急八月武皇進軍渭橋以爲邠寧四面行營都統昭宗還京師十一月武皇破邠州王行瑜走至慶州見殺武皇還軍雲陽請擊茂貞天子慰勞使解仇紆難賜武皇忠貞平難功臣進封晉王是時晉軍渭北武皇上表言統領大軍不敢逕赴朝覲遂班師

乾寧三年正月昭宗復以張濬爲相武皇曰此朱全忠之謀也乃上表曰若陛下朝以濬爲相則臣將暮至闕廷京師大恐濬命遽止三月武皇大掠相魏諸邑六月破魏成安洹水臨漳等十餘邑十月又敗魏人於白龍潭進攻觀音門全忠救至乃解乾寧四年劉仁恭叛晉武皇擊之戰於安塞武皇大敗光化元年四月朱全忠遣葛從周攻下邢洛磁三州九月武皇遣周德威出青山口十月遇從周於張公橋德威大敗冬十二月潞州薛志勤卒李罕之據潞州叛附於朱全忠光化二年春正月全忠遣氏叔琮攻破承天軍又破遼州至於榆次周德威敗之於洞渦驛秋

八月李嗣昭復取澤潞光化三年秋七月嗣昭敗汴軍於沙河復取洛州朱全忠自將圍之嗣昭走至青山口遇伏兵敗冬十月嗣昭取懷州是歲汴人攻鎮定鎮定絕晉附全忠天復元年春全忠封梁王梁攻下晉絳河中執王珂歸晉失三與國乃下意爲書幣聘梁求和梁以晉弱可取乃曰晉雖請盟而書辭慢因大舉擊晉四月氏叔琮入天井張文敬入新口葛從周入土門王處直入飛狐侯言入陰地叔琮取澤潞其別將白奉國破承天軍遼州守將張鄂以城降都人大恐會霖雨積旬梁兵多疾皆解去五月晉復取汾州誅李塘六月周德威李嗣昭取慈隰天復二

年二月進攻晉絳大敗於蒲縣梁軍乘勝破汾慈隰三州遂圍太原武皇懼謀出奔未決梁軍大疫解去德威復取三州天復三年正月天子自鳳翔歸京天復四年梁遷唐都於洛陽改元曰天祐武皇以爲劫天子以遷都者梁也天祐非唐號不可稱仍稱天復八月朱全忠弒昭宗於洛陽宮輝王卽位告哀使至晉陽武皇南向慟哭三軍縞素天復五年春會契丹於雲中約爲兄弟天復六年九月梁攻燕滄州武皇爲燕出兵破潞州梁圍解去天復七年夏四月朱全忠僭稱皇帝僞國號梁僞年號開平廢昭宣帝爲濟陰王武皇復稱天祐四年淮南蜀移檄興復唐室天

新唐書卷一  
祐五年正月辛卯武皇薨於晉陽年五十三莊宗卽位追謚武皇帝廟號太祖陵在鴈門

莊宗武皇之長子也母貞簡皇后曹氏以光啓元年乙巳冬十二月癸亥生於晉陽及爲嬰兒體貌奇特沈厚不羣武皇鍾愛之年十一從討王行瑜令獻捷京師昭宗駭異之賜以灘鷺卮翡翠盤而撫其背曰兒有奇氣後當貴無忘子家及長善騎射膽勇過人習春秋手自繕寫略通大意尤喜歌舞天祐五年正月卽位於晉陽時年二十有四叔父克寧殺都虞侯李成質倖臣史敬鎔告克寧謀叛二月壬戌執而戕之是月朱全忠弒昭宣帝於曹州帝聞之

舉哀號慟四月召德威軍自亂柳還晉陽梁夾城兵聞晉有大喪德威軍且去因頗懈帝謂諸將曰梁人幸我大喪謂我少而新立無能爲也宜乘其怠擊之乃出兵趨上黨五月辛未朔行至三垂岡歎曰此先王置酒處也會天大霧晝暝兵行霧中攻其夾城破之梁軍大敗凱旋告廟九月蜀王王建岐王李茂貞及楊崇本攻梁大安帝亦遣周德威攻其晉陽州敗梁軍於神山天祐六年秋七月梁之叛將劉知俊來乞師帝自將至陰地關遣周德威攻晉州敗梁軍於蒙阮天祐七年冬十月梁攻上黨十一月趙王王鎔來乞師乃救趙天祐八年春正月梁改號乾化帝敗

梁軍於柏鄉斬首二萬級獲將校二百八十五人馬三千  
匹進攻邢州不下留兵圍之去攻魏別遣周德威徇梁夏  
津高唐攻博州破東武廟城遂擊黎陽臨河淇門掠新鄉  
共城燕王劉守光聞之乃大治兵聲言助晉帝患之乃旋  
師七月會趙王王鎔於承天軍劉守光稱帝於燕天祐九  
年正月遣周德威會鎮定以攻燕守光求救於梁梁軍攻  
趙屠棗疆李存審擊走之六月朱全忠爲其子友珪所弑  
八月朱友謙以河中叛於梁來降梁遣康懷英討友謙友  
謙復臣梁而亦陰附於晉天祐十年春二月朱友貞殺友  
珪而自立更名鐸十月劉守光請降帝如幽州守光背約

不降攻破之天祐十一年春正月壬子誅劉守光於太原  
刺其父仁恭心血祭鴈門陵然後斬之於是趙王王鎔北  
平王王處直奉冊推帝爲尙書令始建行臺七月攻梁邢  
州戰於張公橋帝軍不利而退天祐十二年春正月朱友  
貞改號貞明三月魏州軍亂賀德倫以魏博二州叛梁來  
附帝入魏州行至永濟誅其亂首張彥以其兵五百入衛  
號帳前銀鎗軍六月兼領魏博節度使取德州七月取澶  
州劉鄩軍於洹水帝率百騎窺其營遇鄩伏兵圍之數重  
決圍而出亡七八騎八月梁復取澶州帝與鄩對壘於莘  
聲言西歸鄩疑已去卽引兵擊魏攻城東帝行至貝州返

續唐書卷一  
擊鄴大敗之追至故元城又敗之鄴走黎陽三月攻梁衛  
州降其刺史米昭克慈州殺其刺史靳昭四月克洛州八  
月圍邢州降其節度使閻寶梁張筠棄相州戴思遠棄滄  
州而逃遂取二州而貝州人殺梁守將張源德以城降契  
丹寇蔚州執振武節度使李嗣本天祐十四年二月契丹  
寇新州遂寇幽州李嗣源擊走之冬十二月梁人據楊劉  
帝率騎破之天祐十五年春正月梁軍相拒於楊劉決河  
水以限帝軍六月渡水擊破之秋八月辛丑朔大閱於魏  
合盧龍橫海昭義安國及鎮定之兵十萬軍於麻家渡王  
彥章軍於行臺十一月進軍臨濮梁軍追之軍敗周德威

死之梁軍據土山復進擊大敗之遂軍德勝爲夾寨天祐  
十六年三月帝兼領幽州梁王瓚攻德勝南城不克十月  
廣德勝北城敗梁軍於河南天祐十七年夏五月朱友貞  
改號龍德秋七月朱友謙襲同州梁遣劉鄩擊之李存審  
敗梁於同州天祐十八年春正月魏州僧傳眞獲傳國寶  
獻於行臺二月趙將張文禮弒其君鎔來請命乃以文禮  
爲鎮州兵馬留後三月河中節度使朱友謙昭義節度使  
李嗣昭滄州節度使李存審定州節度使王處直邢州節  
度使李嗣源鎮州兵馬留後張文禮領天平軍節度使閻  
寶大同軍節度使李存璋振武軍節度使李存進匡國軍

節度使朱令德各勸進請紹唐帝位帝三辭又三請帝攜  
抑久之八月庚申遣兵馬留後符習及閻寶史建瑋等攻  
張文禮於鎮州建瑋取趙州文禮卒其子處瑾閉門拒守  
九月建瑋戰死十月梁戴思遠攻德勝北城李嗣源敗之  
於戚城王處直叛附於契丹其子都幽於別室以來附十  
二月契丹寇涿州遂寇定州天祐十九年春正月敗契丹  
於新城望都追奔至於幽州三月閻寶敗於鎮州以嗣昭  
代之四月嗣昭戰死以李存進代之八月梁取衛州九月  
存進敗鎮人於東垣存進戰死十月李存審克鎮州鎮人  
請帝兼領本鎮從之

同光元年春三月李繼韜以潞州叛附於梁夏四月己巳  
卽皇帝位改天祐二十年爲同光元年國號唐大赦天下  
行臺左丞相豆盧革爲門下侍郎右丞相盧程爲中書侍  
郎平章事兼修國史中門使郭崇韜昭義監軍張居翰爲  
樞密使以魏州爲東京太原爲西京鎮州爲北都閏月追  
尊祖考爲皇帝妣爲皇后曾祖執宜祖妣崔氏皆謚曰昭  
烈廟號懿祖祖妣秦氏皆謚曰文景廟號獻祖考謚曰武  
廟號太祖立廟於太原自唐高祖太宗懿宗昭宗爲七廟  
壬寅李嗣源取鄆州五月辛酉梁人取德勝南城六月及  
王彥章戰於新壘敗之是月盧程罷秋八月梁人克澤州

守將裴約死之九月戊辰李嗣源及王彥章戰於遞坊敗  
之冬十月壬申如鄆州以襲梁甲戌取中都丁丑取曹州  
己卯滅梁朱鐸自使其將皇甫麟進刀而殺獲其首來獻  
梁敬翔自殺丙戌貶鄭珏爲萊州司戶蕭頊登州司戶殺  
李振趙巖張漢傑朱珪滅其族詔除毀梁宗廟廢朱全忠  
朱鐸爲庶人己丑德音降死罪囚流以下原之十一月乙  
巳復北都爲鎮州太原爲北都丙辰復汴州爲宣武軍丁  
巳尙書左丞趙光允爲中書侍郎禮部侍郎韋說同中書  
門下平章事戊午新羅國王金朴英遣使入貢辛酉復永  
平軍爲西都甲子如洛京十二月庚午朔至西京辛巳李

繼韜伏誅弟繼達殺其兄繼儔於潞州壬辰伯於伊闕

同光二年春正月河南尹張全義及諸鎮進暖殿物己酉  
求唐宦者庚戌新羅王金朴英遣使朝貢乙卯渤海國遣  
使朝貢庚申幸河陽辛酉至自河陽丁卯七廟神主至自  
太原祔於太廟朝獻於太微宮戊辰享於太廟二月己巳  
朔有事於南郊大赦癸酉羣臣上尊號曰昭文睿武至德  
光孝皇帝戊寅幸李嗣源第癸未立劉氏爲皇后三月庚  
戌賜從平汴州及入洛南郊立仗軍士等功臣庚申以李  
塗爲檢視諸陵使夏五月壬寅教坊使陳俊爲景州刺史  
丙園裁接使儲德原爲憲州刺史丙辰渤海國王遣使來

貢丙寅李嗣源克潞州六月己丑封回紇王仁美爲英義  
可汗秋七月己酉幸雷山賽神八月大雨霖河溢九月壬  
子置水於城門以禳熒惑甲寅幸郭崇韜第丙寅黑水國  
遣使朝貢冬十月癸未左熊威將軍趙暉妻一產三男子  
十一月癸卯田於伊闕丙午至自伊闕十二月庚午帝及  
皇后幸張全義第

同光三年春正月庚子如東京毀卽位壇爲鞠場二月聚  
鞠於新場乙亥幸王莽河射燕辛巳突厥渤海皆遣使入  
貢三月乙未寒食望祭於西郊庚申至自東京辛酉改東  
京爲鄴都以洛京爲東都夏四月乙亥帝及皇后幸郭崇

韜朱漢賓第旱庚寅趙光允薨五月丁酉皇太妃薨廢朝  
三日己酉黑水女真遣使入貢六月辛未宗正卿李紆爲  
昭宗少帝改卜園陵使辛卯詔括天下私馬秋七月壬寅  
皇太后崩九月庚子魏王繼岌爲四面行營都統郭崇韜  
爲招討使以伐蜀自六月雨至於是月丁巳幸尖山射燕  
冬十月壬午奚吐渾突厥遣使入貢戊子葬貞簡太后於  
坤陵十一月丁未高麗遣使入貢己酉蜀王衍降十二月  
己卯狩於白沙癸未還宮閏月辛亥封弟存美爲邕王存  
霸永王存禮薛王存渥申王存乂睦王存確通王存紀雅  
王

續唐書卷一  
同光四年春正月壬戌降死罪囚甲子魏王繼岌殺郭崇  
韜及其三子於蜀戊寅契丹遣使貢馬庚辰異母弟存乂  
伏誅殺節度使李繼麟滅其族丙戌回鶻遣使入貢丁亥  
殺李繼麟之將史武等七人滅其族二月己丑宣徽南院  
使李紹茂爲樞密使癸巳鄴都將軍趙在禮反於貝州甲  
午田於冷泉趙在禮陷鄴都武寧節度使李紹榮討之邢  
州將軍趙太反東北面招討使李紹真討之甲辰成德軍  
節度使李嗣源討趙在禮三月趙太伏誅李嗣源反博州  
守將翟建自稱刺史甲子殺王衍滅其族乙丑車駕發京  
師壬申次滎澤龍驤指揮使姚彥溫以前鋒軍叛降於李  
嗣源入於汴甲戌至白萬勝從馬直指揮使郭從謙反夏  
四月丁丑朔帝崩於絳霄殿之廡下時年四十二天成元  
年七月丁卯有司上謚曰光聖神閔孝皇帝廟號莊宗是  
月丙子葬於雍陵

述曰莊宗承武皇之雄圖力戰而平汴洛世讎旣復國祚  
中興其大端在於存唐天祐之紀年奉東西京之廟社使  
天下猶知有唐當日諸藩用天祐年號者劔南不久卽止  
淮南已先稱制鳳翔雖始終不改然預有誤國之罪使莊  
宗得前此數年滅梁輔臣多若張承業之徒言聽計從安  
知不求唐之宗子而立之何必不追美於共和是以宋庠

續唐書卷一終  
作紀年通譜以天祐四年引而下接同光例符於司天所用崇天歷其識誠高出於修五代史者遠矣惟自同光以後近聲色以亂朝綱黷貨財以結衆怨蓋得之甚難失之甚速由於縱欲而不近理居安而不思危有國家者可無戒哉

續唐書卷一終

續唐書卷二

海昌陳鱣撰

武林姜安同校  
長水祝恂

明宗紀

明宗聖德和武欽孝皇帝名亶初名嗣源及卽位改今名代北人也皇考電追尊孝成皇帝皇妣劉氏追謚孝成懿皇后帝卽孝成之元子咸通八年丁亥九月九日生於應州之金城縣初孝成爲部將武皇之鎮鴈門也孝成厭代帝年甫十三善騎射旣壯雄武謙和執事恭敬武皇養爲子賜名嗣源乾寧三年梁攻兗鄆朱宣來乞師武皇遣李存信將兵二萬救之屯於莘縣不進存信遣帝別以兵三

千擊梁梁兵解去存信旋爲羅宏信所敗帝奮命殿軍而  
還武皇嘉之卽以所將五百騎號曰橫衝都光化三年李  
嗣昭攻梁邢洺出青山遇葛從周兵大敗梁兵追之會帝  
本軍至謂嗣昭曰爲公一戰乃解鞍礪鏃憑高列陣左右  
指畫梁人莫測因呼曰吾取葛公士卒可無動乃馳騎犯  
之出入奮擊嗣昭繼進梁兵解去帝身中四矢武皇解衣  
賜藥以勞之由是李橫衝名重四方天祐五年五月晉梁  
相拒於柏鄉梁龍驤將軍以赤白馬爲兩陣旗幟鎧仗皆  
如馬色晉兵望之皆懼莊宗舉酒以飲帝曰望梁家赤白  
馬懼否帝曰有其表耳翼日歸吾廐也莊宗大笑曰卿已

氣吞之矣因引鍾飲爵奮槌馳騎犯其白馬挾二將校而  
回梁兵敗以功拜代州刺史莊宗攻劉守光帝及李嗣昭  
將兵三萬別出飛狐定山後取武媯儒三州魏州旣平因  
徇下磁相拜相州刺史昭德軍節度使久之徙鎮安國契  
丹攻幽州莊宗遣帝與閻寶等擊走之同光元年四月莊  
宗卽位進帝檢校太傅兼侍中尋命帝率步騎五千襲鄆  
州下之授天平軍節度使五月梁人陷德勝莊宗退保楊  
劉梁將王彥章急攻鄆州莊宗悉軍救之以帝爲前鋒敗  
梁軍於中都生擒王彥章等而是時段凝悉將梁兵屯河  
上莊宗未知所向諸將多云乘勝以取青齊惟帝勸取汴

續唐書卷二  
州莊宗然之帝卽時以千騎前進十月己卯帝先至汴州  
攻封邱門王瓚開門出降莊宗後至見帝大悅手引其衣  
以首觸之曰天下與爾共之拜中書令二年二月莊宗以  
郊天賜之鐵券五月擒楊立以獻六月進位太尉移鎮宣  
武兼蕃漢總管十二月契丹入寇三年正月帝敗之於涿  
州徙鎮成德莊宗幸鄴請朝行在不許貞簡太后疾請入  
省又不許太后崩請赴山陵許之而契丹侵邊乃止十二  
月朝於洛陽時朱友謙郭崇韜皆以讒死帝以名位高亦  
見疑忌四年二月趙在禮反於魏大臣皆請遣帝討賊莊  
宗不許固請乃遣之三月壬子帝至鄴都在禮登城謝罪

甲寅軍變帝入於魏與在禮合夜至魏縣丁巳以其兵南  
遣石敬瑭將三百騎爲先鋒帝行過鉅鹿獲官馬三千匹  
以益軍壬寅入汴四月丁亥朔莊宗崩帝痛哭不自勝己  
丑入洛陽甲午監國朝羣臣於興聖宮乙未中門使安重  
誨爲樞密使殺宋州節度使元行欽及租庸使孔謙壬寅  
以樞密副使安循爲樞密使

天成元年四月丙午帝自興聖宮赴西宮卽皇帝位於樞  
前易斬衰以袞冕丁未遣使往諸道及淮南告哀辛亥始  
聽政壬子魏王繼岌薨甲寅受朝制改同光四年爲天成  
元年大赦天下乙卯渤海國王大諲謨遣使朝貢是月張

居翰罷五月丙辰朔太子賓客鄭珏工部尙書任寰爲中書侍郎同中書門下平章事戊辰趙在禮爲義成節度使六月丁酉汴州控鶴軍亂指揮使張諫殺其權知州事高逖己亥諫伏誅秋七月庚申安重誨殺殿直馬延於御史臺門契丹渤海國俱遣使朝貢己卯貶豆盧革爲辰州刺史韋說澉州刺史甲申流革於陵州說於合州丁酉內出象笏三十二賜百官之無笏者己亥契丹寇邊丁未平盧節度使霍彥威殺登州刺史王公儼九月己未幸至德宮及袁建豐第冬十月雲南山後雨林百蠻都鬼主右武衛大將軍李卑晚遣大鬼主傅能何華等來朝貢辛丑契丹遣使告哀輟朝旱辛亥雨

天成二年春正月癸丑朔更名亶癸亥兵部侍郎馮道太常卿崔協爲中書侍郎同中書門下平章事二月壬午朔新羅遣使朝貢壬辰西川節度使孟知祥殺其兵馬都諫李嚴丙申赦京師囚郭從謙爲景州刺史旣而殺之戊戌山南東道節度使劉訓爲南面招討使以伐荆南三月壬子朔幸會節園羣臣買晏盧革軍亂殺其將烏震新羅國遣使來貢四月盧臺軍將龍旺等伏誅六月丙戌任寰罷庚子幸白司馬坡祭突厥神秋七月甲子隨州刺史西方鄴取夔忠萬州癸酉殺豆盧革韋說八月乙酉昆明大鬼

主九部落及牂牁遣使朝貢九月庚午党項遣使朝貢壬申契丹遣使朝貢冬十月乙酉駕發西京宣武軍節度使朱守殷反馬步軍都指揮使馬彥超死之己丑守殷自殺乙未殺太子少保致仕任寰辛丑詔釋輕繫囚是月傳箭於霍彥威十一月乙亥契丹遣使通和十二月己丑回鶻西界吐蕃遣使朝貢丙午追尊四廟立廟於應州

天成三年春正月丁巳契丹陷平州二月乙未孔循罷三月丁未朔以久雨詔求直言己未鄭珏罷癸亥成德軍節度使王建立爲右僕射兼中書侍郎平章事西方鄴克歸州戊辰宣徽南院使范延光爲樞密使尋罷夏四月乙酉

達勒遣使朝貢義武軍節度使王都反壬寅以王晏球爲北面行營招討使五月契丹入於定州秋七月壬戌殺齊州防禦使曹廷隱八月盧龍軍節度使趙德執契丹首領慶州防禦使竇廷琬反冬十月靜難軍節度使李敬周討之十一月甲午王建立罷十二月甲辰李敬周克慶州竇廷琬伏誅

天成四年春正月壬辰回鶻入朝二月癸卯王晏球克定州甲子車駕發汴州三月丙戌殺姪從璨夏四月壬子契丹寇雲州甲寅端明殿學士趙鳳爲門下侍郎兼工部尙書平章事五月己巳朝羣臣賀朔乙酉追謚少帝日昭宣

光烈孝皇帝契丹寇雲州秋七月壬申殺右金吾衛上將軍毛璋八月黑水遣使來朝丁未吐渾首領入貢乙卯党項首領入貢九月癸巳殺供奉官烏昭遇

長興元年春正月宣徽南院使朱宏昭充大內留守二月己亥黑水遣使入貢乙巳天雄軍節度使石敬瑭爲御營使癸丑朝獻於太微宮甲寅享於太廟乙卯有事於南郊改天成五年爲長興元年大赦天下三月庚寅立淑妃曹氏爲皇后夏四月戊戌安重誨使河中衙內指揮使楊彥溫逐其節度使從珂辛亥西京留守索自通執彥溫殺之戊午羣臣上尊號曰聖明神武文德恭孝皇帝秋七月壬

午訪莊宗子孫痊所八月乙未忠武軍節度使張延朗爲三司使壬寅殺捧聖軍使李行德十將張儉滅其族吐渾來附封子從榮爲秦王戊申海州將王傳極殺其刺史陳宣叛吳來降丙辰封子從厚爲宋王九月癸未東川節度使董璋反甲申成德軍節度使范延光爲樞密使丁亥石敬瑭爲東川行營都招討使冬十月己亥頒冰乙巳董璋陷閬州殺節度使李仁矩指揮使姚洪死之孟知祥反十一月庚申朔秦王從榮受冊於文明殿丙戌契丹東丹王突欲來奔十二月丁未二王後秘書丞鄴國公楊仁矩卒輟朝丁巳回鶻遣使來朝安重誨討董璋沙州遣使來朝

長興二年春正月丁丑契丹東丹王進本國三印三月丁亥太常卿李愚爲中書侍郎平章事夏四月甲辰宣徽北院使趙延壽爲樞密使甲寅董璋陷遂州節度使夏魯奇死之閏五月丁酉安重誨妻子並賜死冬十二月甲寅朔除鐵禁初稅農具錢

長興三年春正月庚子契丹遣使朝貢己酉渤海回鶻吐蕃遣使朝貢二月辛未中書奏請依石經文字刻九經印版從之己卯靜難軍節度使藥彥稠及党項戰於牛兒谷敗之三月甲申契丹遣使朝貢夏四月甲寅新羅遣使入貢五月己丑二王後詹事司直楊延紹襲封鄴國公六月

甲寅封王建爲高麗國王大義軍使孟知祥殺董璋陷東川秋七月辛巳朔天下兵馬都元帥錢鏐薨輟朝三日八月己卯吐蕃遣使朝貢冬十月庚申幸至德宮因幸石敬瑭第

長興四年春正月庚寅端明殿學士兵部侍郎劉昫爲中書侍郎平章事二月戊午孟知祥使朱滉來朝三月甲辰追冊晉國夫人夏氏爲皇后夏五月戊寅封子從珂爲潞王從益許王姪從溫堯王從璋洋王從敏涇王丙戌契丹遣使朝貢秋七月乙未回鶻獻白鶻命放之八月庚申大赦天下九月戊戌趙延壽罷山南東道節度使朱宏昭爲

樞密使壬申幸士和亭得疾十一月壬辰秦王從榮以兵  
入興聖宮不克伏誅乙未都指揮使康義誠殺三司使孫  
岳戊戌崩於雍和殿年六十七應順元年四月上謚曰聖  
德和武欽孝皇帝廟號明宗是月二十七日葬於徽陵  
述曰舊史稱明宗能力行乎王化政皆中道時亦小康是  
矣其能得大體者追謚少帝曰昭宣光烈孝皇帝又令國  
子監校定九經雕爲印版流布天下後進賴之誰謂季世  
無善政哉攷五代史闕文云明宗出自邊地老於戰陳卽  
位之歲年已六旬純厚仁慈本乎天性每夕宮中焚香仰  
天禱祝云某蕃人也遇世亂爲衆推戴事不獲已願上天

早生聖人與百姓爲主按此事新修史記亦載於論託爲  
長老之言後人罕知其出於闕文也又五代史補云明宗  
之在位也一旦幸倉場觀納時主者以車駕親臨懼得其  
罪較量甚輕明宗因謂之曰且朕自省事以來倉場散給  
動經一二十年未畢今較量如此其後銷折將何以償之  
對曰竭盡家產不足則繼之以身命明宗愴然曰只聞百  
姓養一家未聞一家養百姓也今後每石加二斗耗以備  
鼠雀侵蠹謂之鼠雀耗倉糧加耗自此始也按此事可疑  
夫百姓足君孰與不足百姓不足君孰與足縱有鼠雀耗  
亦何至每石加二斗之多果如百姓養一家之說則胥徒

得緣以爲姦其患有不可勝言者今之倉糧亦有所謂耗米然定例每石止加二升因胥吏藉端苛索甚至每石加四五斗百姓深受其累得非明宗爲之作俑乎載攷舊史食貨志天成元年敕應納夏秋稅先有省耗每斗一升今後只納正稅數不量省耗夫應納之每斗一升且敕不量今以前所不納而每石加二斗之耗何其歧異或所聞異詞歟若夫明宗時屢以非罪誅戮臣下所謂上下相徇毀譽亂眞是取禍之道也

續唐書卷二終

續唐書卷三

海昌陳鱣謨

武林姜安同校  
長水祝恂

閔帝紀

閔帝名從厚小字菩薩奴明宗第三子也母昭懿皇后夏氏以天祐十一年甲戌十一月二十八日庚申生於晉陽舊第髻鬢好讀春秋略通大義爲人形質豐厚寡言好禮明宗以其貌類己特愛之天成元年授檢校司徒二年四月加檢校太保同平章事三年三月授宣武軍節度使四年徙鎮河東長興元年封宋王徙鎮成德二年徙鎮天雄三年加中書令四年十一月秦王從榮伏誅明宗病甚遣

宣徽使孟漢瓊馳驛召帝而明宗崩秘其喪六日十二月  
癸卯朔發喪於西宮卽皇帝位於柩前羣臣見於東階復  
於喪位丙午成服於西宮庚戌御光政樓存問軍民辛亥  
賜司衣王氏死坐秦王事也癸丑始聽政乙卯賜司儀康  
氏死連王氏也丁巳僕射平章事馮道爲山陵使戶部尙  
書韓彥暉爲副中書舍人王延爲判官禮部尙書王權爲  
禮儀使兵部尙書李鱗爲鹵簿使御史中丞盧敏爲儀仗  
使右僕射權知河南府盧質爲橋道頓遞使丁卯帝釋衰  
服辛未御中興殿羣臣列位馮道進酒帝命徹之  
應順元年春正月壬申朔御廣壽殿視朝乙亥契丹遣使

朝貢丁丑太常卿崔居儉爲祕書監前蔡州刺史張繼祚  
爲左武衛上將軍充山陵橋道頓遞副使戊寅御明堂殿  
宣制大赦天下改長興五年爲應順元年回鶻可汗王仁  
美遣使八貢沙州瓜州遣使來朝甲午兩浙檢校太師兼  
中書令吳王錢元瓘進封吳越王乙未樞密使兼中書令  
朱宏昭馮贇獻錢助作山陵閏月癸卯御文明殿丙午正  
衙命使冊皇太后曹氏甲寅正衙命使冊太妃王氏集賢  
院請修創凌烟閣詔下翰林院置寫真官畫功臣像并下  
將作監興工次序間架修建北京留守石敬瑭獻銀絹助  
作山陵丙寅幸至德宮車駕至興教門有飛鳶自空而墮

疆於御前是日大風晦暝二月庚寅視作山陵是日鳳翔節度使潞王從珂反辛卯西京留守王思同爲西面行營都部署靜難軍節度使藥彥儔爲副部署三月丙辰思同兵潰嚴衛右廂都指揮使尹暉羽林都指揮使楊思權以其軍叛降於潞王辛酉殺侍衛親軍馬軍都指揮使朱宏寶癸亥河陽三城節度使康義誠爲鳳翔行營都招討使王思同爲副西京副留守劉遂雍叛降於潞王思同奔歸於京師不克死之丁卯潞王至陝州帝急召孟漢瓊不至召朱宏昭宏昭懼投於井安重進尋殺馮贇於其第是夜帝出元武門至衛州四月潞王入洛廢帝爲鄂王帝遇鴆

而崩年二十一皇后孔氏與其四子並遇害石敬瑭僭位謚曰閔耐葬徽陵

述曰閔帝德望素隆冲齡踐祚以其無夾輔之良臣遂爲人所猜忌失守宗祧良足悲已帝本明宗第三子而新修史記作第五子吳縝纂誤已辨之矣其謚曰閔帝舊史及會要通鑑皆然而新修史記改爲愍帝豈因莊宗謚爲光聖神閔孝皇帝而改之乎但閔訓弔者在門愍訓爲痛義各不同何遽改更而失其實耶

續唐書卷三終

續唐書卷四

海昌陳鱣撰

武林姜安  
長水祝恂  
同校

末帝紀

末帝名從珂明宗之元子也母宣獻皇后魏氏鎮州平山人中和末明宗狗地山東留戍平山得魏后以光啓元年己巳正月二十三日生帝於外舍屬趙人負盟用兵不息音問阻絕帝甫十歲方得歸小字阿三及壯狀貌雄偉長七尺餘謹重寡言而驍勇明宗甚愛之在太原因擊球與石敬瑭同入趙襄子廟見其塑像屹然起立帝私自負從明宗征討常立戰功莊宗喜曰阿三不惟與我同齒敢戰

亦相類同光二年爲衛州刺史突騎指揮使戍於石門四年魏州軍亂帝率部下軍士由曲陽孟縣趨常山與王建立渡河而南軍聲大振天成元年拜河中節度使二年二月加檢校太保同平章事長興元年加檢校太尉先是帝與樞密使安重誨在常山因杯盤失意拳擊其腦重誨銜之及帝鎮河中重誨知其出入不時乃矯宣中旨令牙將楊彥溫遇出郭則閉門不納會帝閱馬於黃龍莊彥溫閉城拒之帝止虞鄉以聞明宗召還京師居於清化里第重誨數請行軍法不聽天成二年重誨見殺乃起爲左衛大將軍西京留守三年進位太尉移鳳翔節度使四年五月

封潞王閔帝卽位加兼侍中旣而帝子重吉出刺亳州帝方憂不測應順元年二月移帝鎮太原是時不降制書惟以宣授而已帝令李專美草檄求援諸道欲誅君側之罪朝廷命王思同率師來討三月丁巳帝以兵東庚申次長安西京副留守劉遂雍以城降癸亥次靈口殺王思同甲子次華州執藥彥稠繫獄乙丑次閩鄉王仲皋父子迎謁命殺之丙寅次靈寶河中安彥威陝州康思立迎降丁卯次陝州康義誠來降殺宣徽使孟漢瓊閔帝出居於衛州夏四月壬申入京師馮道率百官迎帝於蔣橋帝辭不見入哭於西宮遂見羣臣道拜帝荅拜入居於至德宮癸酉

以太后令降天子爲鄂王命帝監國乙亥帝赴西宮卽皇帝位於柩前丙子詔河南府率京城居民之財以助賞軍丁丑又詔居民預借房課五月以賞軍己卯鄂王薨庚辰磁州刺史宋令詢死之

清泰元年夏四月乙酉帝服袞冕御明堂殿百官就位宣制改應順元年爲清泰元年大赦天下戊子殺康義誠及藥彥稠丙申葬明宗皇帝於徽陵五月庚子朔御文明殿受朝賀丙午端明殿學士韓昭允爲樞密使莊宅使劉延朗爲樞密副使庚戌馮道罷天雄軍節度使范延光爲樞密使甲寅賜勸進選人宗子官六月庚辰幸至德宮因幸

房知溫安元信范延光索自通李從敏第秋七月辛亥太常卿盧文紀爲中書侍郎平章事丁巳立沛國夫人劉氏爲皇后八月辛未尙書左丞姚顛爲中書侍郎平章事詔應會受御署官選九月己未契丹寇邊冬十月戊寅李愚劉昫罷十一月乙亥雄武軍節度使張延朗爲中書侍郎同平章事庚寅幸龍門旱

清泰二年春正月丙申朔御明堂殿二月甲戌范延光罷己丑追尊魯國太夫人魏氏謚曰宣獻皇太后三月辛丑忠武軍節度使趙延壽爲樞密使夏四月辛卯宣徽南院使劉延皓爲樞密使丙申契丹寇邊六月癸未羣臣獻添

都馬秋七月丙申石敬瑭以兵屯忻州軍呼萬歲乃斬都  
指揮使李暉等三十六人以止之丁酉回鶻可汗王仁美  
遣使入貢劉延皓罷九月己酉宣徽南院使房暉爲刑部  
尙書充樞密使乙卯渤海遣使來朝

清泰三年春正月辛卯朔御文明殿乙未百濟遣使入貢  
丁未封皇子重美爲雍王二月庚午監修國史姚顛史官  
張昭遠李祥吳承範等修謨明宗實錄三十卷上之三月  
丙午翰林學士禮部侍郎馬胤孫爲中書侍郎同平章事  
夏四月戊戌河東節度使石敬瑭反乙卯建雄軍節度使  
張敬達爲太原四面都招討使武義軍節度使楊光遠爲

副戍申先鋒指揮使叛降於石敬瑭己酉振武戍將安重  
榮叛降於石敬瑭壬子天雄軍屯駐捧聖都虞侯張令昭  
逐其節度使劉延皓六月癸亥以令昭爲右千牛衛將軍  
權知天雄軍事甲戌宣武軍節度使范延光爲天雄軍四  
面招討使秋七月戊申克復魏州壬子張令昭伏誅癸丑  
彰聖指揮使張萬迪叛降於石敬瑭八月戊午契丹遣使  
入朝九月甲辰張敬達及契丹戰於太原敗績契丹圍敬  
達於晉安戊申帝發京師壬戌詔天下括馬又詔民十戶  
出兵一人冬十一月戊子盧龍軍節度使趙德鈞爲行營  
都統閏月甲子楊光遠殺張敬達以其軍叛降於契丹丁

卯契丹立晉石敬瑭與之約爲父子僞號天福遂與契丹南行甲戌敬瑭與契丹至於潞州丁丑至自河陽辛巳帝崩於元武樓年五十二敬瑭入洛得帝燼骨於火中明年三月葬之於徽陵域中

述曰張昭等修末帝實錄以帝爲明宗之元子生於外舍詳見通鑑攷異所引而通鑑及舊新一史會要等書俱作明帝養子然昭等生唐之世宜得其真今從實錄至帝之謚舊史本作末帝會要亦同新史記改爲廢帝蓋恐其與朱友真相混耳後人并改末帝實錄爲廢帝謬之甚矣又闕文云晉引契丹圍晉安寨降楊光遠清泰帝至自懷覃

京師父老迎帝於上東門外帝垂泣不止父老奏曰臣等伏聞前唐時中國有難帝王多幸蜀以圖進取陛下何不且入西川帝曰本朝兩川節度使皆用文臣所以元宗僖宗避寇幸蜀今孟氏已尊矣吾何歸乎因慟哭入內舉族自焚按末帝無大失德而縱虎喪身慘毒至此敬瑭之肉其足食乎

續唐書卷四終

續唐書卷五

海昌陳鱣誤

武林姜安  
長水祝恂同校

烈祖紀

烈祖光文肅武孝高皇帝名昇字正倫小字彭奴徐州人  
憲宗第八子建王恪之元孫恪生超早卒超生志仕為徐  
州判司卒官因家焉志生榮榮性謹厚晦迹號李道者屬  
時離亂羣盜蜂起而楊行密專據淮南乃感憤欲圖興復  
之志遂因海寇夏韶率眾自海入淮至濠梁間眾至數千  
人與行密相攻為其所擒帝以光啓四年十二月二日生  
於彭城至是方六歲而孤伯父球攜帝及母劉氏避地淮

西至濠州行密見而奇之養以爲子其長子渥不能容乃與大將徐溫曰是兒狀貌非常以乞汝遂冒姓徐名知誥帝事溫盡子道溫妻李氏以其同姓鞠養甚至及長身長七尺廣頰隆準語聲如鐘精采鑠人常緩步行從者疾行莫能及相者云此龍行虎步也天祐六年六月自元從指揮使遷昇州防遏使兼樓船軍使七年五月授昇州副使知州事柴再用攻宣州用其兵殺李遇以功遷昇州刺史時江淮初定守令皆武夫專務軍賦帝獨好學求遺書招賢士褒賢課農雖以節儉自勵而輕財好施無所愛吝以宋齊邱王令謀王翊主議論會禹張洽孫飭徐融爲賓客

馬仁裕周宗曹棕爲親吏十一年加檢校司徒始城昇州十四年五月城成溫來觀喜其制度壯麗徙治焉而以帝爲檢校太保潤州團練使帝本意在宣州不悅時溫子知訓以內外馬步都軍副使專制揚州驕淫失衆宋齊邱納說曰知訓日暮且敗是行天所贊也十五年朱瑾殺知訓馬仁裕自蒜山渡馳告帝帝卽日帥師入廣陵定亂遂代知訓爲淮南節度行軍副使內外馬步都軍副使上下悅服吳王建國以帝爲左僕射參政事末期歲紀綱憲度粲然並舉溫雖遙執國政而人情已歸屬於帝金陵行軍司馬徐玠勸溫更用嫡子知詢帝刺知皇恐表乞罷政事出

鎮江西表未上而溫疾亟遂止溫卒知詢嗣爲金陵節度使諸道副都統數與帝爭權帝乃使人誘之來朝留爲左統軍悉奪其兵而帝以太尉中書令出鎮金陵如溫故事吳命帝開大元帥府置僚屬進封齊王用天子制度改名誥

昇元元年冬十月吳帝禪位甲申卽皇帝位改吳天祚二年爲昇元元年國號齊以十一月二日爲仁壽節尊吳主爲高尙思元宏古讓皇帝上策稱受禪老臣誥追尊考溫爲太祖武皇帝丙申以平章事張延翰爲右僕射兼門下侍郎同平章事門下侍郎張居詠中書侍郎李建勳皆爲

同平章事以建康爲西都廣陵爲東都改尙書爲尙書都省東都尙書省爲留守院丙戌改齊明門爲朝元門丁亥封弟知證爲江王知諤爲饒王戊子降吳太子璉爲宏農郡王辛卯降吳建安王珙江夏王璘等十一人爵一等而加官增戶邑詔獄訟未經本處立決者毋得詣闕訴乙未降吳公主爲邑君甲午立王后宋氏爲皇后丙申封女弟杞國君爲廣德長公主庚子遣使如漢閩吳越告卽位辛丑追封吳歷陽公濛爲臨川王謚曰靈以禮改葬戊申封子景通爲吳王諸道副元帥判六軍諸衛事十一月庚戌朔改東都舊第爲崇德宮癸丑改承宣院爲宣徽院丙辰

追冊故妃楊氏爲順妃丁丑追封次子景遷爲高平郡王  
長女爲封城公主改辭狀司爲清訟院立姪景邁爲晉陵  
郡公景遜爲上饒郡公景邈爲桂陽郡公景逸爲平陽郡  
公封女五人爲盛唐太和永興建昌玉山公主戊午立子  
景遂爲吉王景達爲壽陽郡公以景遂爲東都留守江都  
尹赴東都已未升東都海陵縣爲泰州割鹽城泰興如皋  
興化縣屬焉己巳吳越王使將軍袁韜來賀卽位十二月  
庚寅上太祖武皇帝陵曰定陵追尊高祖以下皆爲王公  
而稱宗配皆稱國君及妃墓皆稱陵惟武皇之配李氏曰  
明德皇后丙午有星孛於北方

昇元二年春正月己酉朔日有食之避殿停朝賀甲子荆  
南高從誨使龐守規來賀卽位二月壬戌閩使內客省使  
朱文進來賀卽位夏四月遷讓皇於丹陽以王輿爲浙西  
卽度使留後馬思讓爲丹陽宮使以嚴兵守之徐氏諸子  
屢請帝復姓帝謙抑不忍忘徐氏恩下其議百官百官皆  
請乃復姓李改名昇國號大唐遂建唐廟祀高祖太宗以  
下如唐舊典追尊建王恪爲孝靜皇帝廟號定宗貞妃程  
氏曰貞靜皇后曾祖超爲孝平皇帝廟號成宗配崔氏曰  
平真皇后祖志爲孝安皇帝廟號惠宗配盧氏曰安莊皇  
后考榮爲孝德皇帝廟號慶宗配劉氏曰德恭皇后奉徐

武皇廟號義祖徐氏二王如初夏六月甲申升池州爲康  
化軍是月高麗使正朝廣評侍郎柳勳律來朝貢秋七月  
壬申以左丞相宋齊邱爲平章事八月戊寅升洪州繡灘  
鎮爲清江縣不隸州丁亥契丹遣使來聘冬十月丙子立  
太學命刪定禮樂癸未新羅遣使來朝貢壬辰命吳王璟  
勒步騎百萬講武銅駝橋十二月辛丑讓皇殂帝不視朝  
率百官素服舉哀是歲徙吳王璟爲齊王

昇元三年春正月壬申詔曰比者干戈相接人無定主地  
蕪而不藝桑隕而弗蠶衣食日耗朕甚憫之其嚮風而納  
者有司計口給食願耕植者授之土田仍復三歲租役於

嘻仁不異遠化無泄邇其務宣流以稱朕意二月乙未契  
丹遣使來以兄禮事帝蜀使來賀卽位夏四月庚辰朝享  
於太廟辛巳有事於南郊以高祖神堯皇帝配用上辛也  
大赦百官進位將士勞賜有差民三年藝桑及三千本者  
賜帛五十匹每丁墾田及八十畝者賜錢二萬皆五年勿  
收租稅詔曰朕以眇躬託於民上常懼勿類以羞高祖太  
宗之遺業羣公卿士願欲進上尊號之禮朕甚不取其勿  
復以聞州郡言符瑞者十數帝曰譴告在天聰明自民魯  
以麟削莽以符亡常謹天戒猶懼或失之符瑞何爲哉皆  
抑而勿揚言五代同居者七家皆蠲復征役旌表門閭丁

未吳越王使左武衛上將軍沈韜文荆南高從誨使王崇嗣來賀南郊作北郊於元武湖西秋七月丙午放諸州所獻珍禽奇獸於鍾山命有司作昇元格與吳令並行冬十月丁丑御後樓閱戰馬

昇元四年春二月詔罷營造力役毋妨農時三月丁未頒中正歷歷官陳承勛所譔也丙戌漢人閩人來聘夏五月晉安州節度使李金全來降六月癸亥罷宣州歲貢木瓜雜果秋八月立齊王璟爲皇太子仍兼大元帥錄尚書事璟固讓從之九月戊辰契丹遣使來聘獻狐白裘冬十月壬寅以齊王璟讓儲貳赦殊死以下京師賜酺內外諸軍

給優賜禁表奏言聖睿二字違者以大不敬論乙巳詔幸東都命齊王璟監國庚戌帝自保德門御舟辛亥次迎鑾鎮甲寅至東都入建元門帝感念疇昔泣然流涕不已遣使問東畿士民不能自存者已未高麗使廣評侍郎柳質來貢方物十一月乙丑宴羣臣於崇德宮故第也乙酉賜東畿高年疾苦憚獨米人二石漢使都官郎中鄭翺閩使客省使葛裕吳越使刑部尚書楊巖來賀仁壽節十二月丙申帝至自東都

昇元五年春二月殺泰州刺史褚仁規夏五月戊辰契丹使來秋七月右僕射李建勳罷八月有星孛於天市遣使

賑貸黃州旱傷戶口是歲吳越水民就食境內賑之

昇元六年閏正月庚寅漢使區延保來聘癸巳閩使尙食使林宏嗣來聘都下大水秦淮溢東都火焚數千家夏五月左丞相太保宋齊邱罷爲鎮南軍節度使六月常宣歙三州大雨漲溢漢蕭規來告哀廢朝三日庚午契丹遣使來聘獻馬五駒大蝗自淮北蔽空而至辛未命州縣捕蝗瘞之辛巳禁節度刺史給攝署牒秋八月甲申漢使法物使公孫惠來謝襲位九月庚寅頒昇元刪定律冬十月詔曰前朝失御四方崛起者衆武人用事德化壅而不宣朕甚悼焉三事大夫其爲朕舉用儒者罷去苛政與吾民更

始十二月閩使徐宏績漢使滕紹英吳越使右武衛大將軍蔣璠來賀仁壽節

昇元七年春正月契丹遣使二十七人來聘獻馬三百羊三萬五千二月庚午帝崩於昇元殿年五十六十一月壬寅葬永陵帝臨崩謂齊王曰德昌宮儲戎器金帛七百萬汝守成業宜善交鄰國以保社稷吾服金石欲延年反以速死汝宜視以爲戒帝生長兵間知民厭亂在位七年兵不妄動境內賴以休息性節儉常躡蒲履用鐵盆盞暑月施青葛帷宮婢纔數人宮室樸陋仁厚恭儉務在養民有古賢主之風焉

述曰烈祖系出唐宗託身徐氏終能化家爲國奄有江南  
建號昇元適承清泰在當日雖未言及此自後論之豈非  
天命有所歸乎攷通鑑云倉吏歲終獻羨餘萬餘石唐主  
日出納有數苟非培民刻軍安得羨餘邪分遣使者按行  
民田以肥瘠定稅民間稱其平允自是江淮調兵興役及  
他賦稅皆以稅錢爲率至今用之又不在外戚輔政宦者  
不得預事皆他國不及也由斯以觀烈祖爲政幾幾乎有  
貞觀開元之風夫乃歎唐之遺澤長矣

續唐書卷五終

續唐書卷六

海昌陳鱣撰

武林姜安  
長水祝恂同校

元宗紀

元宗明道崇德文宣孝皇帝名璟字伯玉烈祖長子母曰  
宋皇后初名景通風度高秀性寬仁有文學甫十歲吟新  
竹詩云棲鳳身枝猶軟弱化龍形狀已依稀人皆竒之起  
家爲尙書郎吳讓皇見之曰吾諸子皆不及也累遷諸衛  
大將軍烈祖爲齊王立爲王太子固讓昇元初烈祖受禪  
封吳王徙齊王四年八月立爲皇太子復固讓曰前世以  
嫡庶不明故早建元良示之定分如臣兄弟友愛尙何待

此烈祖爲下詔稱其守廉退之風師忠貞之節有子如此  
子復何憂赦殊死以下臣民奉賤齊王如太子禮七年二  
月烈祖病疽祕之人皆莫知庚午疾大漸太醫吳廷紹密  
遣人告帝帝馳入宮侍疾於東閣是夕烈祖崩祕不發喪  
而下詔命帝監國大赦頒賚有差丙子始宣遺詔

保大元年春三月己卯朔烈祖崩已旬日帝猶未嗣位方  
泣讓諸弟奉化節度使周宗手取袞冕衣帝曰大行付陛  
下神器之重豈得固守小節是日卽皇帝位不待踰年遽  
改元韓熙載上疏以爲不可而制書已行百官進位二等  
將士皆有賜蠲民逋負租稅賜鰥寡孤獨粟帛尊母宋皇

后爲皇太后立妃鍾氏爲皇后以鎮南軍節度使宋齊邱  
爲太保兼中書令奉化軍節度使周宗爲侍中徙封壽王  
景遂爲燕王宣城王景達爲鄂王閩使來弔祭升濠州爲  
定遠軍秋七月徙燕王景遂爲齊王鄂王景達爲燕王仍  
以景遂爲諸道兵馬元帥居東宮景達爲副元帥仍詔中  
外以兄弟傳國之意八月乙卯立弟景邊爲保寧王冬十  
月庚戌有星孛於東方嶺南妖賊張遇賢犯虔州詔遣洪  
州營屯都虞侯嚴恩帥師討之以通事舍人邊鎬監其軍  
其後擒遇賢及其黨黃伯雄曹景全斬於金陵市十二月  
以太保中書令宋齊邱爲鎮海軍節度使

續唐書卷六  
保大二年春正月侍中周宗罷爲鎮南軍節度使左僕射  
兼門下侍郎平章事張居詠罷爲鎮海軍節度使辛巳詔  
齊王景遂總庶政惟樞密使魏岑查文徽得奏事餘非召  
對不得見初烈祖尤愛景遂帝奉先旨欲傳以位故有是  
詔宋齊邱蕭儼皆上書切諫未見聽侍衛都虞侯賈崇叩  
閣請見曰臣事先帝三十年孜孜詢察下情猶患壅隔階  
下始卽位所委何人而頓與臣下疏絕如此因嗚咽流涕  
帝感悟命坐賜食遂收所下詔夏五月閩將朱文進弒其  
君曦自稱閩王遣使來告帝囚其使將討之議者謂閩亂  
由王延政當先討乃釋閩使遣還秋九月庚午朔日有食

之冬十一月樞密院使查文徽請討王延政詔以文徽爲  
江西安撫使往覘建州文徽固請乃以邊鎬爲行營招討  
共攻延政敗績於蓋竹

保大三年春正月以何敬洙爲福建道行營招討祖全恩  
爲應援使姚鳳爲諸軍都監會查文徽進討秋七月星見  
而風雨八月甲子朔日有食之克建州執王延政歸於金  
陵拜羽林大將軍升建州爲永安軍冬十月皇太后崩以  
延平津爲劔州割建州之劔浦汀州之沙縣隸焉

保大四年春正月以青陽公宋齊邱爲太傅兼中書令昭  
武軍節度使李建勳爲右僕射兼門下侍郎及中書侍郎

馮延巳皆平章事二月壬戌朔日有食之命建州製的乳  
茶號曰京挺膳茶之貢自此始罷貢陽羨茶夏四月葬元  
恭皇后於永陵五月以樞密使陳覺爲福建宣諭使使諭  
李宏義人朝不克覺擅發汀建撫信州兵趨福州帝遂命  
王崇文魏岑馮延魯會攻福州秋九月淮南蠶食稼除民  
田稅冬十月庚辰圍福州改漳州爲南州十二月壬戌契  
丹及晉師戰於中渡晉師敗績丙寅杜重威李守貞以其  
師降於契丹癸酉張彥澤引蕃騎陷京師彥澤剽劫屠害  
甚衆晉主奉表納璽於契丹是歲中原無主密州刺史皇  
甫暉青州刺史王建及沿淮諸戍皆來降

保大五年春正月契丹滅晉遣使來告曰晉少主逆命背  
約自貽廢黜吾主欲與唐繼先世之好將冊命唐爲中原  
主帝命近臣對曰唐守江淮社稷已固與梁宋阻隔若爾  
主不忘先好惠錫行人受賜多矣其他不敢拜命遣兵部  
侍郎賈潭報聘帝歎曰閩役億矣其能抗衡中原乎以齊  
王景遂爲皇太弟燕王景達爲元帥徙齊王元子南昌王  
冀爲副元帥二月辛未劉知遠卽位國號曰漢改晉開運  
四年爲天福十二年三月己亥吳越救福州兵自海道至  
乃整師與戰敗績諸營皆潰夏四月壬申詔卽軍中斬陳  
覺馮延魯餘將帥皆赦不問已而復詔械覺延魯還都旣

至貸死覺流蘄州延魯流舒州秋八月太傅宋齊邱罷爲  
鎮南軍節度使吳越國王錢佐卒侗襲位冬十二月吳越  
胡進思廢其君侗囚於義和院錢俶人是歲楚國王馬希  
範卒希廣卽位

保大六年春正月吳越國立俶遷侗於東府丁丑漢主殂  
承祐立夏六月庚寅朔日有食之秋九月漢伐河中李守  
貞間道表求援師以李金全爲北面行營招討使救河中  
師次沂州退保海州冬十一月荆南主高從誨卒保融嗣  
位

保大七年春正月淮北盜起以神武都虞侯皇甫暉裨將  
張巒蕭處恭監軍散騎常侍張義方帥師萬人出海泗招  
降納賊帥延師朗以歸夏六月癸酉朔日有食之冬十月  
大兵渡淮攻正陽敗績

保大八年春二月福州遣謀者詣建州留後查文徽告吳  
越戍卒亂殺李宏義棄城去文徽信其言襲福州大敗被  
執而別將建州刺史陳誨以舟師敗福州兵執其將馬先  
進俘於金陵秋七月送先進還吳越查文徽亦歸冬十一  
月甲子朔日有食之乙酉漢主承祐殂十二月馬希萼攻  
陷潭州弒其君希廣自稱楚王其將李彥溫劉彥瑫各以  
千人來歸漢將郭威領大軍北征王子次澶州何福進率

壯士擁威作亂

保大九年春正月丁卯郭威篡漢卽位改元廣順國號周  
劉崇自立於太原初契丹犯河南晉主北遷韓熙載上書  
曰陛下有經營天下之志當在今時若契丹遁歸中原有  
主安輯稍定則未可圖也時以連兵南閩至此方議北征  
熙載又上書曰郭氏姦雄雖有國日淺而爲理已固兵若  
輕舉非獨無成抑且有害乃命李金全耀兵於淮上而止  
二月楚王希萼使掌書記劉光翰來貢方物秋九月楚將  
徐威等廢其君希萼命邊鎬出萍鄉以討楚亂冬十月壬  
寅武安留後馬希崇請降鎬入潭州癸丑武昌節度使劉  
仁瞻帥舟師取岳州湖南遂平南漢來攻彬州陷之周尠  
州節度使慕容彥超來乞援師從之

保大十年春正月分洪州高安縣置筠州割清江萬載上  
高屬焉援兖州之師敗績於沐陽周人執指揮使燕敬權  
二月周人歸敬權使來言曰吾賊臣背叛爾國助之豈長  
計哉且使潁州郭瓊遺壽州劉彥貞書其詞曰大周潁州  
團練使郭瓊致書於淮南壽州節度使麾下自古有國皆  
惡叛臣貴邦何爲常事招誘吳中多士無乃淺圖帝頗愧  
其言以翰林學士江文蔚知禮部貢舉放進士王克貞等  
三人及第旋復停貢舉三月以太弟太保馮延巳爲左僕

射前鎮海節度使徐景運爲中書侍郎及右僕射孫忌並同平章事帝以南漢乘楚亂據桂宜等州將取之以知全州張巒兼桂州招討使夏四月丙戌朔日有食之命統軍侯訓帥五千人會張巒攻桂州敗績於城下訓死之巒收餘衆保全州周興順指揮使白進福以族來歸秋九月召朗州劉言入朝冬十月劉言將王逵周行逢攻潭州壬辰拔益陽寨戍將李建期死之丙申潭州節度使邊鎬棄城遁辛丑劉言將蒲公益攻岳州刺史宋德權監軍任鎬棄城遁十一月劉言盡據故楚地詔流邊鎬於饒州斬宋德權任鎬於太社斬裨將申洪泰尹建於都門外平章馮延巳孫忌皆罷爲左右僕射十二月洪州大都督楚王馬希萼來朝留不遣

保大十一年春三月以左僕射馮延巳同平章事金陵火逾月焚官寺民廬數千間復設貢舉夏六月不雨民饑流入周境冬十月築楚州白水塘以溉田命州縣陂塘堙廢者修復之

保大十二年春正月有大星貫於西北聲如雷二月命吏部侍郎朱翬知禮部貢舉壬辰周主殂養子柴榮卽位自前年六月不雨至於今三月大饑疫命州縣煮粥以食之秋七月契丹使其舅來聘夜宴清風驛盜斬其首亡去捕

之不得或以爲周人也契丹自此不至

保大十三年春二月以中書侍郎嚴續爲門下侍郎平章事夏六月周攻秦鳳蜀使間使來告難周下詔罪狀因遣將李穀王彥超韓令坤等來侵淮南攻自壽州帝乃以神武統軍劉彥貞爲北面行營都部署帥師三萬赴壽州奉化節度使同平章事皇甫暉爲北面行營應援使常州團練使姚鳳爲應援都監帥師三萬屯定遠縣召鎮南節度使宋齊邱入朝謀難冬十二月以安定郡公從嘉爲沿江巡撫使

保大十四年春正月周主親征劉彥貞與周師戰於正陽敗績彥貞戰死二月周師兼道襲清流關皇甫暉敗保滁州周師破城俘暉及姚鳳以歸帝遣泗州牙將王承朗奉書至徐州求成於周稱唐皇帝奉書於大周皇帝願以兄事歲獻方物大弟景遂亦移書周將帥皆不報己卯遣翰林學士鍾謨文理院學士李德明使周奉表至下蔡行在納貢又奉牛酒犒軍請罷兵乙酉周師陷東都執副留守馮延魯丁亥左神衛使徐象等十八人自壽州奔周天長制置使耿謙以城降於周遣園苑使尹延範護遷讓皇之族於潤州延範殺其男子六十人誅延範以謝國人周師陷泰州刺史方訥棄城遁帝遣間使求援於契丹至淮北

爲周人所執吳越侵常州宣州靜海制置使姚彥洪奔吳越三月遣司空孫晟及禮部侍郎王崇質使周削去帝號奉表稱爲外臣猶不許光州兵馬都監張延翰以城降於周刺史張紹遁還丁酉周師陷舒州刺史周宏祚赴水死蘄州將李福殺知州王承雋降於周戊戌天成軍節度使蔡暉自壽州奔周周師陷和州詔斬李德明於都市坐奉使請割地也吳越陷常州之郛執團練使趙仁澤燕王宏冀遣龍武都虞侯柴克宏救常州壬子大敗吳越兵於常州斬獲萬計俘其將數十至潤州宏冀悉斬之壬戌壽州軍校陳延貞等十三人奔周是月命諸道兵馬元帥齊王

景達拒周夏四月復泰州五月周主北還秋七月復東都蘄光和滁州惟壽州之圍愈急冬十月行人孫晟爲周人所殺從者二百人皆死獨貸鍾謨以爲耀州司馬

保大十五年春二月乙亥周主親征齊王景達自濠州遣邊鎬許文稹朱元帥兵數萬援壽州景達用監軍使陳覺言謀奪朱元兵以楊守忠代之元遂舉師降周裨將時厚卿獨不從見殺壬辰周師盡破諸塞執邊鎬許文稹楊守忠餘衆悉奔潰景達亦遁歸金陵三月丁未壽州劉仁瞻病革副使孫羽等代署表降於周仁瞻卒夏四月周主北還冬十一月周主復親征濠州刺史郭廷謂泗州刺史范

續唐書卷六  
九  
再遇皆舉城降帝知東都必不守使焚其廬舍徙其民於  
江南周師入揚州丁丑陷泰州

中興元年春正月改元中興丙戌周師陷海州壬辰陷靜  
海軍丁未陷楚州守將張彥卿鄭昭業死之周師屠其城  
焚廬舍殆盡周師次雄州刺史易文贊舉城降三月大赦  
改元交泰立燕王冀爲皇太子參治朝政丁亥周主次楊  
州丁卯遂至迎鑾鎮壬辰耀兵江口帝懼周師南渡遣樞  
密使陳覺奉表貢方物請傳位太子以國爲附庸周主始  
采唐報可汗故事答書稱皇帝致書江南國主帝遣閤門  
承旨劉承遇上表稱唐國主盡獻江北郡縣之未陷者歲

輸土貢庚子周主致書許帝奉正朔罷兵而不許傳位夏  
五月下合去帝號稱國主去交泰年號稱顯德五年置進  
奏邸於汴都凡帝者儀制皆從貶損改名景以避周信祖  
諱告於太廟是日金陵大霧通夕不解己酉周遣使賚御  
衣金玉帶錦帛羊馬及犒軍帛十萬凡士卒俘於周者皆  
遣還冬十一月己亥暴宋齊邱陳覺李徵古罪放齊邱歸  
九華山覺安置饒州徵古削官爵尋皆賜自盡齊邱明年  
亦幽死

交泰二年周顯德六年夏六月癸巳周主殂梁王宗訓嗣  
位秋七月鍾謨請鑄大錢文曰永通貨泉以一當十與舊

錢並行又鑄唐國通寶錢一當開通錢之二九月丙午太子冀卒冬十一月建洪州爲南都南昌府

交泰三年春正月甲辰周遜位於宋改元建隆元年宋廢周主爲鄭王放江南降將三十四人來歸二月始鑄鐵錢三月遣使朝貢於宋夏四月太子太傅馮延巳卒秋七月遣禮部郎中龔慎儀朝貢於宋自是貢獻尤數歲費以萬計冬十月宋揚州節度使李重進叛來乞師拒之十一月丁未宋平李重進因遣使如宋犒軍朝貢

交泰四年宋建隆二年春二月國遷於南都立吳王從嘉爲太子留金陵監國遂舟行旌旄仗衛六軍百司凡千餘里不絕所過勞問高年疾苦大宴於當塗至宋家泚暴風飄舟幾至北岸翼日從官皆輕舟奔問二日至南都宋遣通事舍人王守貞來勞問南都迫隘羣臣皆思歸主上亦悔遷北望金陵鬱鬱不樂承心堂承旨秦承裕常引屏風障之復議東遷未及行而寢疾不復進膳惟啜蔗漿嗅藕華夏六月己未疾革親書遺令留葬西山累土數尺爲墳且曰違吾言者非忠臣孝子是夕有大星貫於南都庚申帝崩於長春殿年四十六在位一十九年後主不忍從遺令迎喪還秋八月至金陵丁未殯於宮中萬壽殿告哀於宋且請追復帝號宋許之次年正月戊寅葬順陵元宗多

才藝好讀書便騎善射在位幾二十年恭儉禮賢睦族愛民字孤裕然有人君之度少喜栖隱築館於廬山瀑布前蓋將終焉迫於紹襲而止然自唐室苗裔誅于斤大境土之說及福州湖南再喪師知攻取之難始議弭兵務農或曰願陛下十數年勿復用兵元宗曰兵可終身不用何十數年之有會周師大舉寄任多非其人折北不支至於蹙國降號憂悔而終悲夫

述曰史稱元宗約己慎刑勤政如一而野史又謂其天性儒懦素昧威武平心論之自乾符以來猶不失爲令主惟是任用五鬼屏棄羣賢耗帑用於楚閩致喪師於淮甸謀之不臧後悔亦何及哉

續唐書卷七

海昌陳鱣撰

武林姜安同校  
長水祝恂

後主紀

後主名煜字重光元宗第六子也母光穆皇后鍾氏初名從廣廣類豐頰駢齒一目重瞳子文獻太子忌其有奇表因避禍覃思經籍自幼聰慧善屬文工書畫歷封安定郡公鄭王文獻太子卒徙吳王以尙書令知政事居東宮元宗十九年遂立爲太子監國六月元宗崩於南都秋七月喪還太子卽位於金陵更名煜居喪哀毀幾不勝赦境內尊鍾后曰聖尊后以后父名大章也立妃周氏爲國后封

續唐書卷七  
弟從善爲韓王從鎰爲鄧王從謙爲宜春王從信爲文陽  
郡公從度爲昭平郡公合諸司無職事者四品至九品日  
二員待制於內殿以右僕射嚴續爲司空平章事餘進位  
有差遣中書侍郎馮延魯如宋奉表陳襲位宋賜詔荅之  
自是始降詔秋九月宋遣鞍轡庫使梁義來弔祭冬十月  
宋遣樞密承旨王文來賀襲位初元宗雖臣於周惟去帝  
號他猶用王者禮至是國主始易紫袍見使者使退如初  
服十一月國后周氏殂十二月置龍翔軍以教水戰

二年宋建隆三年春三月遣馮延魯入貢於宋泉州節度  
使中書令晉江王劉從卒子紹鎡自稱留後夏四月泉州  
將陳洪進執紹鎡歸金陵推副使張漢思爲留後六月遣  
客省使翟如璧入貢於宋宋放降卒千人南還冬十一月  
遣水部郎中顧彝入貢於宋

三年宋乾德元年春正月遣使來賜羊馬橐駝三月宋出  
師平荆湖高繼冲歸於宋國除國主遣使犒軍夏四月泉  
州副使陳洪進廢張漢思自稱權知軍府來告遂以洪進  
爲節度使秋七月宋詔遣還顯德以來中朝將士在江南  
者及令揚州民遷江南者還其故土冬十二月上表於宋  
乞罷詔書不名之禮不從

四年宋乾德二年春正月始用鐵錢每十錢以鐵錢六權

銅錢四而行命吏部侍郎修國史韓熙載知貢舉放進士  
王崇古等九人命中書舍人徐鉉覆試舒雅等五人雅等  
不就乃自命詩賦敵題以中書官涖其事五人皆見黜秋  
八月宋以江北置折北務禁商旅過江九月封長子仲寓  
爲清源公次子仲宣爲宣城公冬十月甲辰仲寓卒追封  
岐王十一日宋遣作坊副使魏丕來弔祭

五年宋乾德三年春葬昭惠后於懿陵宋俘蜀孟昶於京  
師國除夏五月司空平章事嚴續罷爲鎮海軍節度使秋  
九月聖尊后鍾氏殂冬十月宋遣染院使李光圖來祭葬  
光穆皇后於順陵

六年宋乾德四年夏五月以吉州刺史楊守忠爲武清軍  
節度使留後秋八月遣龔慎儀持書使南漢約與俱事宋  
九月慎儀至番禺被執

七年宋乾德五年春命兩省侍郎諫議給事中中書舍人  
集賢勤政殿學士更直光政殿召對咨訪率至夜分

八年宋開寶元年春三月戊申以樞密使右僕射殷崇義  
爲左僕射同平章事境內旱宋賜米麥十萬石冬十一月  
立國后周氏昭惠后之母弟也

九年宋開寶二年春三月以左僕射游簡言兼門下侍郎  
平章事夏五月簡言卒以禮部侍郎湯悅爲門下侍郎知

制誥冬較獵於青龍山還憩大理寺親錄囚徒原貸甚衆  
韓熙載奏獄訟有司之事囹圄之中非車駕所至請捐內  
帑錢三百萬充資庫用從之

十年宋開寶三年中書侍郎韓熙載卒贈平章事命境內  
崇修佛寺又於禁中廣署僧尼精舍多聚僧徒迨至數千  
給廩米緡帛供之

十一年宋開寶四年春宋俘劉鋹於京師國除國主聞宋  
滅南漢屯兵於漢陽大懼遣太尉中書令鄭王從善朝貢  
稱江南國主請罷詔書不名從之冬有商人上密事請往  
江陵竊燒新造戰船國主懼不從

十二年宋開寶五年春二月宋屯師漢陽人心大恟乃下  
令貶損儀制改詔爲敕中書門下省爲左右內史府尙書  
省爲司會府御史臺爲司憲府翰林院爲文館樞密院爲  
光政院大理寺爲詳刑院客省爲延賓院官號亦從改易  
殿庭始去鴟吻諸弟封王者皆爲公從善楚國從鎰江國  
從謙鄂國內史舍人張泌知禮部貢舉放進士楊遂等三  
人清耀殿學士張洎言泌多遺才乃命洎考覆遺不中第  
者於是又放王綸等五人閏月癸巳宋命進奉使楚國公  
從善爲泰寧節度使留京師賜第汴陽坊示欲召國主人  
朝也乃遣戶部尙書馮延魯入謝從善爵命延魯至京師

病不能朝而歸

十三年宋開寶六年春宋使翰林學士盧多遜來聘國主願受爵命不許以司空殷崇義知左右內史事冬十月內史舍人潘佑上書切諫佑素與戶部侍郎李平交厚國主惡之乃收平下大理自縊次收佑自剄皆徙其家

十四年宋開寶七年秋上表求從善歸國不許宋遣閤門使梁迥來聘從容言曰今歲國家有柴燎之禮當入助祭國主不荅九月丁卯宋遣知制誥李穆爲國信使持詔來曰朕以仲冬有事園止思與卿同閱犧牲且諭以將出師宜早入朝之意國主辭以疾且曰臣事大朝冀全宗祀不

意如有死而已時宋已遣潁州團練使曹翰先出江陵宣徽南院使曹彬等率舟師繼發及是又命山南東道節度使潘美等率師水陸並進與國信使李穆同日行冬十月遣江國公從鎰如宋貢帛二十萬匹白金二十萬斤又遣起居舍人潘慎修貢宴帛萬匹錢五百萬禁城聚糧大爲守備閏十月宋拔池州國主於是下令戒嚴去開寶年號公私牘籍稱甲戌歲辛未宋師進拔蕪湖及雄遠軍吳越亦大舉兵犯常州乃遣吳越王書曰今日無我明日豈有君一旦明天子易地賞功王亦大梁一布衣耳吳越王表其師於宋宋師次采石磯作浮橋成長驅渡江遂至

金陵每歲大江春夏暴漲謂之黃花水至是水皆退小唐人異之國主以軍旅委皇甫繼勳機事委陳喬張泊又以徐元瑀刁衍爲內殿傳詔而遽書警奏日夜狎至元瑀等輒屏不以聞宋師屯城南十里閉門守陴國主猶不知也初烈祖有國凡民產二十以上出一卒號義軍分籍者又出一卒號新義軍客戶有三丁者出一卒號拔山軍元宗時許郡縣村社競渡每歲重午日官閱試之勝者給綵帛銀椀皆籍姓名至是盡取爲卒號凌波軍民奴及贅壻號義勇軍募豪民以私財招聚亡賴亡命號自在軍至是大蒐境內自老弱外皆募爲卒號排門軍民間又有自相率拒敵以紙爲甲農器爲兵者號白甲軍凡十三等皆使捍禦然實皆不可用奔潰相踵

十五年宋開寶八年國主稱乙亥歲春二月壬戌宋師拔金陵關城三月丁巳吳越來攻常州權知州事禹萬誠以城降吳越遂會宋師圍金陵洪州節度使朱令贇帥勝兵十五萬赴難金陵益危蹙宋師百道攻城晝夜不休城中斗米萬錢人病足弱死者相藉國主兩遣徐鉉等厚貢方物求緩兵守祭祀皆不報冬十一月乙未城陷將軍尚彥馬承信及弟存俊率壯士數百力戰而死勤政殿學士鍾禧朝服坐於家亂兵至舉族就死不去光政使右史侍郎

陳喬請死不許自縊死國主帥司空左右內史事殷崇義等肉袒降於軍門明年正月辛未至京師乙亥授右千牛衛上將軍封違命侯宋晉王卽位加特進改封隴西公太平興國三年秋七月辛卯殂是日七夕卽生日也年四十二在位十五年追封吳王葬洛陽北邙山江南人聞之皆巷哭設齋後主天資純孝事元宗盡子道居喪哀毀杖而後起嗣位之初屬保大軍興之後國勢削弱帑庫空竭專以愛民爲急蠲賦息役以裕民力尊事中原不憚卑屈境內賴以稍安者十有五年憲司章疏有繩糾過訐者皆寢不下論決死刑多從未減有司過爭乃得少正猶垂泣而

後許之著雜說百篇時人以爲可繼典論又工於音律然酷好釋老頗廢政事長圍旣合內外隔絕城中之人惶怖失所後主猶幸靜居室聽沙門講經又延鄱陽隱士周惟簡入後苑講易羣臣皆知國亡在日暮而張洎猶謂北師已老將自遜去後主益甘其言晏然自安命戶部員外郎伍喬於圍城中放進士三十八人及第其所施爲大抵類此故雖仁愛足以感其遺民而卒不能保社稷云述曰自古有國家者所宜炯戒多矣而其要在乎遠聲色闢釋老有一於此未或不亡況兼而有之不亡何待耶夫唐三百五十年之天祚至是而斬則更可慨也夫

續唐書卷七

續唐書卷七終



